

*Aruba Softball Bond:*

## Eldrick Dijkhoff hunto cu Angelo Arnold lo reforsa seleccion Hulandes na Canada

Aruba Softball Bond orguyoso di su atletanan y nan logronan. Bayendo bek un poco den historia nos por recorda cu na 2012 durante Champ of the Champs un torneo internacional di halto nivel organisa pa un miembro di ASB esta SV Royal Power cual ta wordo auspacia pa ASB a cuminsa habri e portanan internacional pa nos atletanan.

Asina e tempo aya un ekipo Hulandes cu a bin Aruba pa competi den Champ of the Champs cual tabata consisti di hungadonan y scoutman di seleccion di Hulanda entre otro Glennsig Polonius a scout Eldrick Dijkhoff pa

forma parti di seleccion di Hulanda pa e Campeonato Mundial di Softball cual a tuma luga na maart 2013 na New Zealand. Campeonato Mundial di Softball ta cada 2 aña unda e 16 miho paisnan cu clasifica lo enfrenta otro den e evento di mas halto y competitivo cu e deporte di softball conoce.

Paisnan fuerte cu miho pitchernan di mundo lo bataya contra otro manera Australia, New Zealand, USA, Canada, Venezuela, Argentina pa nombra algun. Federacion di Hulanda esta KNBSB a acerca Aruba Softball Bond desde Januari e aña aki cu nan ta interesa pa reforsa seleccion di Hulanda cu 2 atleta di Aruba

pa e proximo campeonato mundial cual lo tuma luga di 26 di Juni pa 5 di Juli 2015 na Saskatoon Canada. Despues di intercambio di documentonan oficial ASB a bay over na "release" tanto Eldrick

Dijkhoff y Angelo Arnold pa seleccion di Hulanda. Ambos atleta ta constantemente den preparacion hopi fuerte y lo ta saliendo 20 di Juni proximo pa Canada pa asina incorpora nan mes den seleccion

di Hulanda.

Esaki sigur ta un soño di cualkier atleta pa hunga contra e miho nan di mundo. Separa di e dos atletanan di Aruba tin 2 Arubiano mas biba na Hulanda cu tambe a cay den seleccion y Aruba mester ta contento di su talentonan. Revin Brooks y Jerome Wouters ta dos talento mas biba na Hulanda cu ta den seleccion Hulandes. ASB mester gradici tambe NV Elmar y Do It Center kendenan ta coopera pa nos atletanan por haya nan dlanan liber di trabou pa por representa Hulanda den e ocasion aki den un evento mundial. Ambos atleta ta militando den e ekipo Royal Power na Aruba kendenan lo mira nan ultimo accion den campeonato regular diabierna awor 19 di Juni pa 9pm riba veld di Kudawecha prome cu nan biaha pa Canada.

Muy probablemente Angelo Arnold lo mira accion riba monticulo como parti di su preparacion tambe pa un mundial. Aruba mester ta orguyoso di su atletanan y ta desea tanto Eldrick Dijkhoff, Angelo Arnold, Jerome Wouters y Revin Brooks pero alabes henter e seleccion di Hulanda hopi exito. ASB lo manda mas despues e website unda pueblo por sigui e weganan aki. Pabien Aruba y exito na seleccion di Hulanda. □

